

შეზღუდული პასუხისმგებლობის საზოგადოება
«რიონი კაპიტალი»

წესდება

თბილისი, 2023წ.

სარჩევი

მუხლი 1. ზოგადი დებულებები.....	3
მუხლი 2. შეზღუდული პასუხისმგებლობის საზოგადოების პარტნიორები და მათი უფლება-მოვალეობები.....	4
მუხლი 3. შეზღუდული პასუხისმგებლობის საზოგადოების პარტნიორის მიერ ინფორმაციის მიღებისა და დოკუმენტაციის გაცნობის უფლება	6
მუხლი 4. შეზღუდული პასუხისმგებლობის საზოგადოების პარტნიორის მიერ დომინანტური მდგომარეობის ბოროტად გამოყენება.....	6
მუხლი 5. შენატანი.....	6
მუხლი 6. კაპიტალი.....	7
მუხლი 7. შეზღუდული პასუხისმგებლობის საზოგადოების მმართველი ორგანოები	7
მუხლი 8. საერთო კრება.....	7
მუხლი 9. საერთო კრების უფლებამოსილება.....	9
მუხლი 10. ხელმძღვანელი ორგანო.....	10
მუხლი 11. საზოგადოების ხელმძღვანელობის ზოგადი პრინციპები.....	11
მუხლი 12. პარტნიორის გასვლა.....	13
მუხლი 13. პარტნიორის გარიცხვა	14
მუხლი 14. შეზღუდული პასუხისმგებლობის საზოგადოების დაშლა და რეორგანიზაცია.....	14
მუხლი 15. ბუღალტრული აღრიცხვა, ანგარიშგება და აუდიტი.....	16

მუხლი 1. ზოგადი დებულებები

1. შეზღუდული პასუხისმგებლობის საზოგადოება („შპს“) – «რიონი კაპიტალი» არის „მეწარმეთა შესახებ“ საქართველოს კანონის შესაბამისად შექმნილი სამეწარმეო საზოგადოება (იურიდიული პირი), რომლის კაპიტალი დაყოფილია წილებად, ხოლო ამ საზოგადოების ვალდებულებებისთვის პარტნიორების პასუხისმგებლობა შეზღუდულია.
2. შეზღუდული პასუხისმგებლობის საზოგადოება წარმოშობილად ითვლება და იურიდიული პირის სტატუსს იძენს მეწარმეთა და არასამეწარმეო (არაკომერციული) იურიდიული პირების რეესტრში რეგისტრაციის მომენტიდან.
3. შეზღუდული პასუხისმგებლობის საზოგადოების სამართლებრივი სტატუსი განისაზღვრება საქართველოს კანონმდებლობით და ამ წესდებით. საკითხები, რომლებიც არ არის მოწესრიგებული ამ წესდებით, რეგულირდება მოქმედი კანონმდებლობით.
4. ეს წესდება წარმოადგენს პარტნიორთა შორის დადებული სადამფუძნებლო შეთანხმების ნაწილს, რომელიც გამოხატავს მათ ურთიერთთანხვედრ ნებას და იგი სავალდებულო ძალის მქონეა პარტნიორებისთვის. წესდებით განსაზღვრული ნორმები სავალდებულოა არა მხოლოდ მეწარმე სუბიექტის იმ დამფუძნებელთათვის, რომლებიც მეწარმე სუბიექტის დაფუძნების მომენტისთვის წარმოადგენენ პარტნიორებს, არამედ იმისთვისაც, ვინც მომავალში გახდება ამ სუბიექტის პარტნიორი.
5. პარტნიორთა შეთანხმება ემყარება პარტნიორთა კეთილსინდისიერების, ურთიერთპატივისცემის, გადაწყვეტილების მართლზომიერად და გულისხმიერებით მიღების ზოგად პრინციპებს. პარტნიორთა მიერ დაცულია მოქმედი კანონმდებლობით განსაზღვრული სამეწარმეო საქმიანობის ძირითადი პრინციპები.
6. შეზღუდული პასუხისმგებლობის საზოგადოების შექმნის მიზანია მართლზომიერი, არაერთგვარადი და დამოუკიდებელი სამეწარმეო საქმიანობის საფუძველზე მოგების მიღება.
7. შეზღუდული პასუხისმგებლობის საზოგადოება «რიონი კაპიტალი»-ს საქმიანობის საგანს წარმოადგენს კაპიტალში წილის, აქციების, ობლიგაციების, სერტიფიკატების, თამასუქების, ჩეკებისა, სხვა ფასიანი ქაღალდებისა და ფინანსური ინსტრუმენტების მიმოქცევასთან დაკავშირებული ოპერაციების განხორციელება, აგრეთვე, ამ ოპერაციების მომსახურება, მათ შორის:
 - a) პირდაპირი კონსულტაციების გაწევა ინვესტორებისთვის ინვესტიციებთან დაკავშირებით, მათ შორის, ფასიანი ქაღალდების ფასის, ფასიან ქაღალდებში ინვესტიციების განხორციელების, ფასიანი ქაღალდების ყიდვა-გაყიდვისა და მათთან დაკავშირებულ უცხოური ვალუტით გარიგებებში;
 - b) ფინანსურ ინსტრუმენტებთან და მათ ემიტენტებთან დაკავშირებული კვლევის განხორციელება და ამ კვლევის შედეგების ან/და საინვესტიციო სტრატეგიასთან დაკავშირებული რეკომენდაციების გავრცელების უზრუნველყოფა;
 - c) ემიტენტებისათვის ფასიანი ქაღალდების გამოშვებისა და ინვესტიციების მოზიდვის თაობაზე კონსულტაციის გაწევა;
 - d) ემიტენტის ფასიანი ქაღალდების მოზიდვა და განთავსება არაგარანტირებულ საფუძველზე;
 - e) კლიენტების დავალებების მიღება და გადაცემა ფასიან ქაღალდებთან დაკავშირებით, კლიენტების სახსრებით ფასიანი ქაღალდების გარიგების განხორციელება მათივე ინტერესებისათვის;
 - f) კლიენტების, მათ შორის, საინვესტიციო პორტფელის და ფასიანი ქაღალდებით ოპერაციებისათვის გამოყოფილი სახსრების მართვა, გარდა კოლექტიური პორტფელის მართვისა;
 - g) კლიენტების სახელით და ხარჯით ფასიანი ქაღალდების და სხვა ფინანსური აქტივების ყიდვა/გაყიდვა;
 - h) კლიენტების საინვესტიციო სახსრების ან/და ფასიანი ქაღალდების შენახვა და აღრიცხვის მართვა, აგრეთვე ფასიანი ქაღალდების ნომინალური მფლობელის მომსახურება და ამ მიზნით კლიენტების ფულადი და ფასიანი ქაღალდების ანგარიშების გახსნა და მათზე ოპერაციების წარმოება;
 - i) საკუთარი სახსრებით ფასიანი ქაღალდებით გარიგების განხორციელება თავისივე ინტერესებისთვის;
 - j) ემიტენტის ფასიანი ქაღალდების განთავსება გარანტირებულ საფუძველზე;
 - k) ვალუტის ყიდვა-გაყიდვა;
 - l) დერივატივების დადება;
 - m) სხვა ოპერაციები ფინანსურ ინსტრუმენტებთან, სამეწარმეო საზოგადოების წილებთან, „ფასიანი ქაღალდების ბაზრის შესახებ“ საქართველოს კანონით განსაზღვრული სხვა უფლებამოსილებების განხორციელება;
 - n) უცხოური ვალუტის სავაჭრო პლატფორმის ორგანიზების გაწევა.
8. შეზღუდული პასუხისმგებლობის საზოგადოებას ასევე უფლება აქვს მოგების მიღების მიზნით განახორციელოს კანონით აუკრძალავი ნებისმიერი სამეწარმეო საქმიანობა. ის საქმიანობა, რომლის განხორციელებაც კანონმდებლობით შესაძლებელია მხოლოდ სპეციალური ლიცენზიის/ნებართვის/ავტორიზაციის საფუძველზე, დასაშვებია მხოლოდ შესაბამისი ლიცენზიის/ნებართვის მიღების ან/და ავტორიზაციის მომენტიდან.
9. შეზღუდული პასუხისმგებლობის საზოგადოება თავისი მიზნების მისაღწევად ფლობს ქონებას, იძენს ქონებრივ და პირად არაქონებრივ უფლებებს და კისრულობს ვალდებულებებს, ასევე შეუძლია თავისი სახელით გამოვიდეს სამართლებრივ ურთიერთობებში, კანონის ფარგლებში თავისუფლად დადოს გარიგებები როგორც საქართველოში, ისე მის ფარგლებს გარეთ, განსაზღვროს ამ ხელშეკრულების შინაარსი, დადოს ისეთი ხელშეკრულებები, რომლებიც კანონით არ არის გათვალისწინებული, მაგრამ არ ეწინააღმდეგება მას, ასევე შეიძინოს ქონებრივი და არაქონებრივი უფლებები და იკისროს მოვალეობები, იყოს მოსარჩელე ან/და მოპასუხე სასამართლოში.

10. შეზღუდული პასუხისმგებლობის საზოგადოების პასუხისმგებლობა კრედიტორების წინაშე შემოიფარგლება მთელი მისი ქონებით, რაც იმას ნიშნავს, რომ საზოგადოების ვალდებულებებისთვის საზოგადოების პარტნიორები და დირექტორი პასუხს არ აგებენ. შეზღუდული პასუხისმგებლობის საზოგადოება პასუხს არ აგებს პარტნიორთა ვალდებულებებისთვის.

11. შეზღუდული პასუხისმგებლობის საზოგადოება თავის საქმიანობაში დამოუკიდებელია. იგი თავად იღებს გადაწყვეტილებას მისთვის მნიშვნელოვან საკითხზე. საზოგადოება შედგება შესაბამისი ორგანოებისაგან, რომლებიც უზრუნველყოფენ მის მართვასა და წარმომადგენლობას. საზოგადოების მართვის ორგანოები და მათი უფლებამოსილებები განსაზღვრულია სადამფუძნებლო შეთანხმებით. ამასთან, აღნიშნული ორგანოები საქმიანობას ახორციელებენ მხოლოდ მათთვის მინიჭებული უფლებამოსილების ფარგლებში.

12. შეზღუდული პასუხისმგებლობის საზოგადოებას აქვს დამოუკიდებელი ბალანსი, ასევე, საზოგადოებას შეიძლება ჰქონდეს ანგარიში საქართველოში ან უცხოეთის ქვეყნების საბანკო დაწესებულებებში, ელექტრონული შტამპი ან ბეჭედი, ბლანკი და ემბლემა. საზოგადოებას უფლება აქვს გახსნას შესაბამისი ანგარიშები ნებისმიერ ბანკში, როგორც ეროვნულ, ისე უცხოურ ვალუტაში.

13. შეზღუდული პასუხისმგებლობის საზოგადოებას უფლება აქვს, დადგენილი წესის მიხედვით, გახსნას თავისი საწარმოები, ფილიალები და წარმომადგენლობები როგორც საქართველოს ტერიტორიაზე, ისე მის ფარგლებს გარეთ, ასევე მონაწილეობა მიიღოს სხვა ორგანიზაციების და წარმოებების შექმნაში. საზოგადოება უფლებამოსილია გაერთიანდეს სხვადასხვა სახის გაერთიანებებში.

მუხლი 2. შეზღუდული პასუხისმგებლობის საზოგადოების პარტნიორები და მათი უფლება-მოვალეობები

1. შეზღუდული პასუხისმგებლობის საზოგადოების პარტნიორი არის პირი, რომელიც შეზღუდული პასუხისმგებლობის საზოგადოების წილის მესაკუთრეა.

2. შეზღუდული პასუხისმგებლობის საზოგადოების პარტნიორებს გააჩნიათ და ეკისრებათ ამ წესდებითა და საქართველოს მოქმედი კანონმდებლობით დადგენილი უფლებები და ვალდებულებები.

3. პარტნიორმა, თავისი უფლებებით სარგებლობისას, მხედველობაში უნდა მიიღოს შეზღუდული პასუხისმგებლობის საზოგადოებისა და დანარჩენ პარტნიორთა კანონიერი ინტერესები და უფლებები. საზოგადოების პარტნიორი საზოგადოების ვალდებულებისთვის კრედიტორის წინაშე პასუხს არ აგებს. გამონაკლის შემთხვევაში საზოგადოების პარტნიორი კრედიტორის წინაშე პასუხს აგებს პირადად, თუ ის პასუხისმგებლობის შეზღუდვის სამართლებრივ ფორმას ბოროტად იყენებს და საზოგადოებას არ შეუძლია კრედიტორის მოთხოვნის დაკმაყოფილება.

4. თანაბარ პირობებში პარტნიორებს თანაბარი უფლება-მოვალეობები აქვთ. ამ პრინციპიდან გამონაკლისი დაიშვება მხოლოდ იმ შემთხვევაში, თუ ეს კანონით ან ამ წესდებით არის პირდაპირ გათვალისწინებული და აუცილებელია შეზღუდული პასუხისმგებლობის საზოგადოების ინტერესებიდან გამომდინარე.

5. პარტნიორს (პარტნიორი-გამყიდველი) შეუძლია განკარგოს და გადასცეს (გაასხვისოს) თავისი წილი შეზღუდული პასუხისმგებლობის საზოგადოებისა და სხვა პარტნიორთა თანხმობით.

6. საზოგადოების პარტნიორს უფლება აქვს გაასხვისოს თავისი წილი (წილის ნაწილი) მესამე პირზე, საზოგადოების სხვა პარტნიორების მიერ უპირატესი შესყიდვის უფლების გამოყენებით, შეიძინონ წილი (წილის ნაწილი) პარტნიორი-გამყიდველის მიერ მესამე პირისთვის გასაყიდად შეთავაზებული პირობებით.

7. პარტნიორი, რომელიც აპირებს თავისი წილის მესამე პირზე მიყიდვას, ვალდებულია საზოგადოების პარტნიორებს გაუგზავნოს შეტყობინება თავისი წილის (წილის ნაწილის) მესამე პირზე მიყიდვის განზრახვის, შეთავაზებული წილის (წილის ნაწილის) ოდენობის, ფასის, კაპიტალის გაზრდის ოდენობის და პირობების (ასეთის არსებობის შემთხვევაში), და გარიგების სხვა არსებითი პირობების შესახებ.

შეტყობინების სკანირებული ასლი უნდა გაიგზავნოს პარტნიორი-გამყიდველისთვის ცნობილი საზოგადოების პარტნიორი-შემძენების (წილის შემძენი) ელექტრონული ფოსტის მისამართზე. შეტყობინება პარტნიორი-შემძენის მიერ ელექტრონული ფოსტით მიღებულად ითვლება პარტნიორი-გამყიდველისგან ელექტრონული ფოსტით გაგზავნის დღის მომდევნო დღეს. საზოგადოების პარტნიორ-შემძენს უფლება აქვს ისარგებლოს პარტნიორი-გამყიდველის წილის (წილის ნაწილის) შემძენის უპირატესი შესყიდვის უფლებით, შეტყობინების მიღებიდან 30 დღის განმავლობაში, პარტნიორი-გამყიდველის ელ. ფოსტაზე შეთავაზებული პირობებით წილის (წილის ნაწილის) შესყიდვაზე თანხმობის გაგზავნით. თუ წილის (წილის ნაწილის) შემძენის უპირატესი უფლების გამოყენების თაობაზე სურვილს გამოთქვამს რამდენიმე პარტნიორი, გასაყიდად შეთავაზებული წილი (წილის ნაწილი) ნაწილდება ამ პარტნიორებს შორის მათი წილების პროპორციულად. პარტნიორი-შემძენები ვალდებული არიან აცნობონ პარტნიორ-გამყიდველს უპირატესი შესყიდვის უფლების განხორციელებაზე უარის თქმის შესახებ მისთვის შესაბამისი შეტყობინების გაგზავნისთვის მითითებულ ვადაში. პარტნიორი-გამყიდველისგან შეტყობინების მიღებიდან 30 დღის განმავლობაში პარტნიორი-შემძენის მხრიდან უპირატესი შესყიდვის უფლების განხორციელებაზე უარის ან თანხმობის შესახებ შეტყობინების არარსებობა ნიშნავს პარტნიორის უარს წილის შესყიდვის უპირატესი უფლების გამოყენებაზე.

8. წესდების მე-2 მუხლის მე-7 პუნქტით დადგენილი შესყიდვის უპირატესი უფლების განხორციელების ვადაში პარტნიორი-გამყიდველი ვალდებულია მიყიდოს წილი (წილის ნაწილი) პარტნიორს-შემძენს, რომელმაც განაცხადა თანხმობა უპირატესი

შესყიდვის უფლების განხორციელებაზე შეტყობინებაში შემოთავაზებული პირობებით. პარტნიორი-გამყიდველს უფლება აქვს გაყიდოს წილი (წილის ნაწილი), რომლის მიმართაც პარტნიორებმა არ გამოიყენეს უპირატესი შესყიდვის უფლება, მესამე პირზე, შეტყობინებაში შეთავაზებული პირობებით.

9. გადაწყვეტილება, რომელიც ზღუდავს, კრძალავს ან/და პარტნიორების ან შეზღუდული პასუხისმგებლობის საზოგადოების თანხმობაზე დამოკიდებულს ხდის პარტნიორის მიერ თავისი წილის გადაცემას ნებისმიერი ფორმით განკარგვას, გარდა გაყიდვისა, ან უფლებრივად დატვირთვას) ან/და ცვლილება შეაქვს მოქმედ შეზღუდვაში, აკრძალავს ან წილის გადაცემისთვის ნებისმიერი ფორმით განკარგვას, გარდა გაყიდვისა, ან უფლებრივად დატვირთვისთვის) საჭირო თანხმობის გაცემის წესში, მიიღება მხოლოდ ყველა იმ პარტნიორის თანხმობით, რომელსაც აღნიშნული შეზღუდვა ან აკრძალვა ეხება.

10. წილის გადაცემის შესახებ შეთანხმება წერილობით უნდა გაფორმდეს. პარტნიორი ვალდებულია წილის გადაცემის შესახებ შეთანხმების გაფორმებისთანავე აცნობოს ამის თაობაზე შეზღუდული პასუხისმგებლობის საზოგადოებას.

11. წილის გადაცემა ძალაში შედის საქართველოს იუსტიციის სამინისტროს მმართველობის სფეროში მოქმედი საჯარო სამართლის იურიდიული პირის – საჯარო რეესტრის ეროვნული სააგენტოს (შემდგომ – მარეგისტრირებელი ორგანო) მიერ წილის ახალი პარტნიორის სახელზე რეგისტრაციისთანავე. ამ შემთხვევაში გამოიყენება კეთილსინდისიერი შემძენის შესახებ საქართველოს კანონმდებლობით დადგენილი ნორმები. წილის გასხვისების მომენტში გასხვისებულ წილთან დაკავშირებული შეუსრულებელი ვალდებულებებისთვის შეზღუდული პასუხისმგებლობის საზოგადოების წინაშე სოლიდარულად აგებენ პასუხს წილის გამსხვისებელი და წილის შემძენი პარტნიორები.

12. პარტნიორებს უფლება აქვთ მონაწილეობა მიიღონ შეზღუდული პასუხისმგებლობის საზოგადოების მართვაში ამ წესდებითა და მოქმედი კანონმდებლობით განსაზღვრული წესებისა და პროცედურების შესაბამისად.

13. შეზღუდული პასუხისმგებლობის საზოგადოებაში პარტნიორთა წილები განისაზღვრება მათი შენატანის პროპორციულად. პარტნიორებს აქვთ ერთი კლასის წილები, რომელთა ნომინალური ღირებულება არის ერთი და იგივე.

14. შეზღუდული პასუხისმგებლობის საზოგადოების რეგისტრაციამდე მისი სახელით ნაკისრი ვალდებულებებისთვის უშუალოდ და შეუზღუდავად, როგორც სოლიდარული მოვალეები, პასუხს აგებენ საზოგადოების დამფუძნებელი პარტნიორები და იმ მოქმედების განმახორციელებლები, რომელმაც გამოიწვია ამ ვალდებულებების წარმოშობა, თუ კრედიტორთან სხვა რამ არ არის შეთანხმებული.

15. შეზღუდული პასუხისმგებლობის საზოგადოების რეგისტრაციამდე მისი სახელით მოპოვებული უფლებები და ნაკისრი ვალდებულებები საზოგადოების მიერ მოწონების შემთხვევაში იქცევა საზოგადოების უფლებებად და ვალდებულებად. ასეთ შემთხვევაში საზოგადოების დამფუძნებელი პარტნიორები და იმ მოქმედების განმახორციელებლები, რომელმაც გამოიწვია აღნიშნული უფლებების ან/და ვალდებულებების წარმოშობა, თავისუფლდებიან ამ ვალდებულებებისგან, თუ კრედიტორთან სხვა რამ არ არის შეთანხმებული.

16. პარტნიორებს უფლება აქვთ შეიტანონ სარჩელი თავისი სახელით და შეზღუდული პასუხისმგებლობის საზოგადოების სასარგებლოდ საზოგადოების კუთვნილი მოთხოვნის განსახორციელებლად, კანონმდებლობით დადგენილი წესით.

17. „მეწარმეთა შესახებ“ საქართველოს კანონით გათვალისწინებული პროცედურების დაცვით, პარტნიორს უფლება აქვს გავიდეს შეზღუდული პასუხისმგებლობის საზოგადოებიდან, თუ საზოგადოების ხელმძღვანელობის ან პარტნიორთა ქმედებები მნიშვნელოვნად აზიანებს მის ინტერესებს, ან არსებობს კანონით გათვალისწინებული მნიშვნელოვანი საფუძველები.

18. ყოველ პარტნიორს, შეზღუდული პასუხისმგებლობის საზოგადოების მოგების/ქონების განაწილების შესახებ მიღებული გადაწყვეტილების საფუძველზე, უფლება აქვს მიიღოს წლიური ან შუალედური დივიდენდი. დივიდენდი დგინდება შეზღუდული პასუხისმგებლობის საზოგადოების პარტნიორთა წილის პროპორციულად.

19. დაუშვებელია გაცემული დივიდენდის უკან მოთხოვნა, გარდა იმ შემთხვევისა, როცა დივიდენდის მიმღებმა პარტნიორმა მიღებისას იცოდა ან უნდა სცოდნოდა, რომ დივიდენდის განაწილებისას ადგილი ჰქონდა კანონით ან ამ წესდებით დადგენილი ნორმების დარღვევას. შეზღუდული პასუხისმგებლობის საზოგადოებას უფლება არ აქვს გასცეს დივიდენდი, თუ ეს საზოგადოების გადახდისუნარიობას გამოიწვევს.

20. თუ წილი შეზღუდული პასუხისმგებლობის საზოგადოებაში რამდენიმე პირის თანასაკუთრებაშია, ისინი თანაპარტნიორებად მიიჩნევიან. ამ შემთხვევაში წილთან დაკავშირებული უფლებები შეიძლება განახორციელოს მათ მიერ განსაზღვრულმა ერთ-ერთმა თანაპარტნიორმა ან მესამე პირმა. ეს პირები სოლიდარულ კრედიტორებად მიიჩნევიან. აღნიშნულ შემთხვევაში მოქმედებს საქართველოს სამოქალაქო კოდექსის ნორმები თანასაკუთრების ან/და საზიარო უფლებების შესახებ.

21. თუ თანაპარტნიორები ან მემკვიდრეები ხმათა უმრავლესობით ვერ თანხმდებიან წილის მართვაზე, შეზღუდული პასუხისმგებლობის საზოგადოების ან თანაპარტნიორის ან ერთ-ერთი მემკვიდრის განცხადების საფუძველზე სასამართლო ნიშნავს წილის მმართველს, რომელსაც მინიჭებული აქვს წილთან დაკავშირებული ყველა უფლება.

მუხლი 3. შეზღუდული პასუხისმგებლობის

საზოგადოების პარტნიორის მიერ ინფორმაციის მიღებისა და დოკუმენტაციის გაცნობის უფლება

1. დირექტორი ვალდებულია ნებისმიერ პარტნიორს მოთხოვნისთანავე, გონივრულ ვადაში მიაწოდოს ინფორმაცია შეზღუდული პასუხისმგებლობის საზოგადოების საქმიანობის შესახებ და მისცეს შეზღუდული პასუხისმგებლობის საზოგადოების საქმიანი დოკუმენტაციის გაცნობის საშუალება.
2. ინფორმაციის გაცემაზე უარი დასაშვებია მხოლოდ შეზღუდული პასუხისმგებლობის საზოგადოების არსებითი ინტერესების ხელყოფის რისკისგან დაცვის მიზნით, რაც წერილობით უნდა იქნეს დასაბუთებული. ინფორმაციის გაცემაზე უარი ასევე დასაშვებია, თუ მოთხოვნილი ინფორმაცია საჯაროდ ხელმისაწვდომია.

მუხლი 4. შეზღუდული პასუხისმგებლობის

საზოგადოების პარტნიორის მიერ დომინანტური მდგომარეობის ბოროტად გამოყენება

1. თუ შეზღუდული პასუხისმგებლობის საზოგადოების დომინანტმა პარტნიორმა თავისი დომინანტური მდგომარეობა განზრახ გამოიყენა ამ საზოგადოების საზიანოდ, მან უნდა აანაზღაუროს მიყენებული ზიანი.
2. დომინანტ პარტნიორად მიიჩნევა პარტნიორი ან ერთად მოქმედ პარტნიორთა ჯგუფი, რომელსაც აქვს პრაქტიკული შესაძლებლობა, გადაწყვეტი გავლენა მოახდინოს საერთო კრებაზე ჩატარებული კენჭისყრის შედეგზე. ეს პარტნიორი/პარტნიორთა ჯგუფი ვალდებულია, შეზღუდული პასუხისმგებლობის საზოგადოებისთვის მიყენებული ზიანის გარდა, აანაზღაუროს აგრეთვე პარტნიორისათვის მიყენებული ზიანი, გარდა იმ ზიანისა, რომელიც მას მიადგა საზოგადოებისთვის მიყენებული ზიანიდან გამომდინარე, მათ შორის, მისი წილის ღირებულების შემცირებით.
3. პირი, რომელიც განზრახ იყენებდა თავის ძალაუფლებას შეზღუდული პასუხისმგებლობის საზოგადოების საწინააღმდეგოდ, აგრეთვე ზემოქმედებას ახდენდა საზოგადოების მმართველი ორგანოს წევრზე, რათა ამ წევრს საზოგადოების საწინააღმდეგო ისეთი ქმედება ჩაედინა, რომელმაც ზიანი გამოიწვია, ვალდებულია საზოგადოებას აუნაზღაუროს მიყენებული ზიანი. აღნიშნული პირი ვალდებულია, საზოგადოებისთვის მიყენებული ზიანის გარდა, აანაზღაუროს აგრეთვე პარტნიორისათვის მიყენებული ზიანი, გარდა იმ ზიანისა, რომელიც მას მიადგა საზოგადოებისთვის მიყენებული ზიანიდან გამომდინარე, მათ შორის, მისი წილის ღირებულების შემცირებით.
4. შეზღუდული პასუხისმგებლობის საზოგადოების დირექტორი, რომელმაც არ შეასრულა მოვალეობა, პასუხს აგებს სოლიდარულად, ამ მუხლის მე-3 პუნქტით გათვალისწინებულ პირთან ერთად. დირექტორის მიერ ამ ქმედების მოწონება საზოგადოების დირექტორს არ ათავისუფლებს მას ზიანის ანაზღაურების ვალდებულებისგან. დირექტორი ვალდებული არ არის აანაზღაუროს ზიანი, თუ მისი ქმედება კანონის შესაბამისად მიღებულ საერთო კრების გადაწყვეტილებას ეფუძნებოდა.
5. შეზღუდული პასუხისმგებლობის საზოგადოებისთვის მიყენებული ზიანისთვის სოლიდარულად აგებს პასუხს ის პირიც, რომელმაც ზიანის გამოწვევა ქმედების შედეგად სარგებელი მიიღო და განზრახ მოახდინა ზემოქმედება ამ მუხლის მე-3 პუნქტით გათვალისწინებულ პირზე.
6. კრედიტორისთვის ზიანის ანაზღაურების ვალდებულება არ უქმდება შეზღუდული პასუხისმგებლობის საზოგადოების მიერ შესაბამის მოთხოვნებზე უარის თქმით ან იმაზე მითითებით, რომ ზიანის გამომწვევი ქმედება საერთო კრების გადაწყვეტილებას ეფუძნებოდა.

მუხლი 5. შენატანი

1. შენატანი არის შეზღუდული პასუხისმგებლობის საზოგადოებისთვის საკუთრებაში გადაცემული ქონება, რომლის ეკონომიკური ღირებულება აისახება საზოგადოების ბალანსში.
2. შეზღუდული პასუხისმგებლობის საზოგადოების კაპიტალში შენატანის შეტანის განხორციელების ვალდებულება შეიძლება შესრულდეს ფულის გადახდით (ფულადი შენატანი) ან სხვა მატერიალური ან არამატერიალური ქონებრივი სიკეთის გადაცემით (არაფულადი შენატანი). სამუშაოს შესრულება ან მომსახურების გაწევა შეიძლება იყოს არაფულადი შენატანის საგანი.
3. ფულადი შენატანი განხორციელებულად მიიჩნევა ფულის/თანხის შეზღუდული პასუხისმგებლობის საზოგადოების მიერ გახსნილ საბანკო ანგარიშზე ჩარიცხვის მომენტიდან.
4. არაფულადი შენატანი განხორციელებულად მიიჩნევა საკუთრების უფლების გადაცემისთვის საქართველოს კანონმდებლობით დადგენილი საჭირო მოქმედებების შესრულების მომენტიდან.
5. თუ არაფულადი შენატანის ღირებულება, მისი განხორციელების დროს, ნაკლებია შეთანხმებული შენატანის ოდენობაზე, პარტნიორი ვალდებულია შეთანხმებული შენატანის ღირებულება შეავსოს ფულადი სახით.
6. არაფულადი შენატანის ღირებულება მისი განხორციელების დროს აღემატება შეთანხმებული შენატანის ოდენობას, პარტნიორი უფლებამოსილია მოითხოვოს სხვაობის ფულადი სახით დაბრუნება, ხოლო საზოგადოება უფლებამოსილია ამ ვალდებულების შესრულება გადაავადოს არაუმეტეს 1 წლით.
7. არაფულადი შენატანის ღირებულების შენატანის ოდენობასთან შესაბამისობის შეფასებას და შენატანის ვალდებულების შესრულების ორგანიზებას უზრუნველყოფს შეზღუდული პასუხისმგებლობის საზოგადოების დირექტორი.

8. პარტნიორის მოთხოვნისას დირექტორმა უნდა გასცეს წერილობითი ცნობა შენატანის განხორციელების ვალდებულების, მისი შესრულების ან ნაწილობრივი შესრულების, ასევე შესრულების ვადებისა და პირობების შესახებ.
9. შენატანის განხორციელების ცნობის ბრალეულ უზუსტობაზე პასუხისმგებლობა ეკისრება დირექტორს.
10. დაუშვებელია პარტნიორის გათავისუფლება შენატანის შეტანის ვალდებულებისაგან, გარდა კანონით გათვალისწინებული შემთხვევისა.
11. შენატანი უნდა შესრულდეს პარტნიორთა მიერ შეთანხმებული წესითა და ვადებში.

მუხლი 6. კაპიტალი

1. შეზღუდული პასუხისმგებლობის საზოგადოებას შეიძლება ჰქონდეს განთავსებული კაპიტალი.
2. თუ შეზღუდული პასუხისმგებლობის საზოგადოებას აქვს მხოლოდ ნომინალური ღირებულების წილები, განთავსებული კაპიტალის ოდენობა უნდა შეადგენდეს ნომინალური ღირებულების წილების ჯამს. იმ შემთხვევაში, თუ საზოგადოებას განთავსებული აქვს როგორც ნომინალური ღირებულების მქონე, ისე ნომინალური ღირებულების არმქონე წილები, განთავსებული კაპიტალის ოდენობა უნდა აღემატებოდეს ნომინალური ღირებულების მქონე წილების ჯამს. იმ შემთხვევაში, თუ საზოგადოებას განთავსებული აქვს მხოლოდ ნომინალური ღირებულების არმქონე წილები, განთავსებული კაპიტალის ოდენობა შეიძლება განისაზღვროს ნებისმიერი ოდენობით.
3. შეზღუდული პასუხისმგებლობის საზოგადოების განთავსებული კაპიტალი გამოისახება ეროვნულ ვალუტაში.
4. განთავსებული კაპიტალის თავდაპირველი ოდენობა განისაზღვრება სადამფუძნებლო შეთანხმებით. გადაწყვეტილება განთავსებული კაპიტალის ოდენობის ცვლილების შესახებ მიიღება პარტნიორების მიერ.

მუხლი 7. შეზღუდული პასუხისმგებლობის საზოგადოების მმართველი ორგანოები

1. შეზღუდული პასუხისმგებლობის საზოგადოების ორგანოებია: **საერთო კრება და ხელმძღვანელი ორგანო (დირექტორი).**
2. შეზღუდული პასუხისმგებლობის საზოგადოების ორგანოები და მათი წევრები ახორციელებენ საქმიანობას და იღებენ გადაწყვეტილებებს მხოლოდ კანონით ან/და ამ წესდებით დადგენილი კომპეტენციის ფარგლებში.

მუხლი 8. საერთო კრება

1. საერთო კრებაში მონაწილეობის უფლება აქვს შეზღუდული პასუხისმგებლობის საზოგადოების ყველა პარტნიორს, გარდა კანონით გათვალისწინებული გამონაკლისის შემთხვევისა.
2. თუ შეზღუდული პასუხისმგებლობის საზოგადოებას ერთადერთი პარტნიორი ჰყავს, პარტნიორთა კრების უფლებამოსილებას ის ახორციელებს. ამგვარი უფლებამოსილების ფარგლებში მიღებული გადაწყვეტილება წერილობით ფორმდება.
3. შეზღუდული პასუხისმგებლობის საზოგადოება, სულ მცირე, წელიწადში ერთხელ, წლიური ბალანსის შედგენიდან არაუგვიანეს 6 თვისა ატარებს მორიგ საერთო კრებას. მორიგ საერთო კრებას იწვევს და მისი ჩატარებისთვის პასუხისმგებელია საზოგადოების დირექტორი.
4. საერთო კრება ტარდება დირექტორის მიერ საერთო კრების მოწვევის შესახებ შეტყობინების ელექტრონული პორტალის სუბიექტის ავტორიზებული მომხმარებლის გვერდზე (ელექტრონულ მისამართზე) საჯაროდ გამოქვეყნებიდან და პარტნიორებისთვის მოსაწვევების გაგზავნიდან სულ ცოტა 14 დღის შემდეგ. საერთო კრების ჩატარების ადგილი და დრო გაუმართლებლად არ უნდა ზღუდავდეს პარტნიორის საერთო კრებაში მონაწილეობის უფლებას. საერთო კრების მოწვევის შესახებ შეტყობინება/მოსაწვევი უნდა შეიცავდეს საერთო კრების დღის წესრიგს. საერთო კრების მოწვევის შესახებ შეტყობინების ელექტრონული პორტალის სუბიექტის ავტორიზებული მომხმარებლის გვერდზე (ელექტრონულ მისამართზე) საჯაროდ გამოქვეყნებიდან 7 დღის შემდეგ. პარტნიორისთვის კრების მოწვევის შესახებ შეტყობინება ჩაბარებულად ითვლება, გარდა იმ შემთხვევისა, როდესაც პარტნიორი დაამტკიცებს, რომ სხვა პარტნიორისთვის კრების მოწვევის თაობაზე უფრო ადრე იყო ცნობილი.
- 4.1. კრების მომწვევი ორგანოს გადაწყვეტილებით, პარტნიორს შეუძლია ხმის მიცემა წერილობით/ელექტრონული კომუნიკაციის საშუალებებით საერთო კრების დაწყებამდე ან/და საერთო კრების მიმდინარეობის დროს.
- 4.2. ელექტრონული კომუნიკაციის საშუალების გამოყენებით კენჭისყრის დროს, კრების მომწვევი ორგანოს მიერ უზრუნველყოფილი უნდა იქნას კრებაში მონაწილე პირის იდენტიფიკაციის შესაძლებლობა და ელექტრონული კომუნიკაციის სისტემის უსაფრთხოება. საერთო კრების ჩატარების პროცედურა, აგრეთვე პარტნიორთა ან/და მათი წარმომადგენლების ნების გამოვლენა ფიქსირდება ნოტარიუსის მიერ თუ კანონით ან პარტნიორთა შეთანხმებით (ასეთის არსებობის შემთხვევაში) სხვა რამ არ არის დადგენილი.
5. პარტნიორს უფლება აქვს დირექტორს მოსთხოვოს საერთო კრების დღის წესრიგის თითოეული საკითხის თაობაზე განმარტებების გაცემა და წარადგინოს თავისი მოთხოვნა/აზრი. თუ პარტნიორის მოთხოვნა საერთო კრებამდე სულ ცოტა 3 დღით ადრე წერილობით იქნება წარდგენილი, იგი უნდა დაკმაყოფილდეს ან შეტანილი უნდა იქნეს დღის წესრიგში ერთ-ერთ

საკითხად. პარტნიორს შეუძლია ამავე წესით მოითხოვოს დღის წესრიგში საკითხის შეტანა/დამატება. საერთო კრების დღის წესრიგის საკითხის თაობაზე განმარტებების გაცემაზე ან დღის წესრიგში საკითხის შეტანის მოთხოვნაზე უარის თქმა დასაშვებია მხოლოდ შეზღუდული პასუხისმგებლობის საზოგადოების არსებითი ინტერესების დასაცავად, რაც წერილობით უნდა იქნეს დასაბუთებული.

6. პარტნიორთა რიგგარეშე კრების მოწვევის უფლება აქვს დირექტორს, ხოლო დირექტორის არყოფნის შემთხვევაში (გარდაცვალება, თანამდებობიდან გადადგომა, მათი უფლებამოსილების სხვაგვარად შეწყვეტა და სხვა) – პარტნიორს/პარტნიორებს, რომელიც/რომლებიც ფლობს/ფლობენ შეზღუდული პასუხისმგებლობის საზოგადოების წილების ან ხმის უფლების მქონე წილების, სულ მცირე, 5 პროცენტს.

7. პარტნიორს/პარტნიორებს, რომელიც/რომლებიც ფლობს/ფლობენ შეზღუდული პასუხისმგებლობის საზოგადოების წილების ან ხმის უფლების მქონე წილების, სულ მცირე, 5 პროცენტს (ინიციატორი პარტნიორი/პარტნიორები), უფლება აქვს/აქვთ წესდების შესაბამისად კრების მოწვევის უფლებამოსილების მქონე ორგანოს მოსთხოვოს/მოსთხოვონ პარტნიორთა რიგგარეშე კრების მოწვევა. პარტნიორთა რიგგარეშე კრების მოწვევის მოთხოვნის უფლება წარმოიშობა ბოლო საერთო კრების ჩატარებიდან არაუადრეს 1 თვისა.

8. პარტნიორთა რიგგარეშე კრების მოწვევის შესახებ ინიციატორი პარტნიორის/პარტნიორების მოთხოვნა წერილობით უნდა იქნეს წარდგენილი და უნდა შეიცავდეს მისი დღის წესრიგის საკითხებს. ამ საკითხების შინაარსი უნდა შეესაბამებოდეს საქართველოს კანონმდებლობას, შეზღუდული პასუხისმგებლობის საზოგადოების მიზნებსა და საქმიანობის ხასიათს. დირექტორი ვალდებულია აღნიშნული მოთხოვნის მიღებიდან არაუგვიანეს 3 თვისა ჩაატაროს პარტნიორთა რიგგარეშე კრება.

9. თუ პარტნიორთა რიგგარეშე კრების მოწვევის შესახებ ინიციატორი პარტნიორის/პარტნიორების მოთხოვნის წარდგენიდან 20 დღის ვადაში ის არ მოიწვევა, ინიციატორ პარტნიორს/პარტნიორებს უფლება აქვს/აქვთ თავად მოიწვიოს/მოიწვიონ რიგგარეშე კრება, დაამტკიცოს/დაამტკიცონ მისი დღის წესრიგი და აირჩიოს/აირჩიონ რიგგარეშე კრების თავმჯდომარე შემდეგის გათვალისწინებით:

საერთო კრების თავმჯდომარის არჩევამდე ან იმ შემთხვევაში, თუ საერთო კრების თავმჯდომარე არ იქნა არჩეული, კრებას თავმჯდომარეობს მისი მომწვევი პირი, მომწვევი ორგანოს თავმჯდომარე ან მომწვევი იურიდიული პირის ხელმძღვანელი, ხოლო თუ მომწვევი რამდენიმე პირია – მომწვევ პირთა ან მომწვევ იურიდიულ პირთა ხელმძღვანელებისგან წილისყრით განსაზღვრული პირი.

10. პარტნიორთა რიგგარეშე კრება გადაწყვეტილებაუნარიანია, თუ მას ესწრებიან შეზღუდული პასუხისმგებლობის საზოგადოების ხმების უმრავლესობის მფლობელი პარტნიორები.

11. საერთო კრება ირჩევს საერთო კრების თავმჯდომარეს. საერთო კრების თავმჯდომარის არჩევამდე ან იმ შემთხვევაში, თუ თავმჯდომარე არ იქნა არჩეული, საერთო კრებას თავმჯდომარეობს მისი მომწვევი პირი, მომწვევი ორგანოს თავმჯდომარე ან მომწვევი იურიდიული პირის ხელმძღვანელი, ხოლო თუ მომწვევი რამდენიმე პირია – მომწვევ პირთა ან მომწვევ იურიდიულ პირთა ხელმძღვანელებისგან წილისყრით შერჩეული პირი.

12. საერთო კრების მიერ თავისი კომპეტენციის ფარგლებში მიღებული გადაწყვეტილების შესრულება სავალდებულოა შეზღუდული პასუხისმგებლობის საზოგადოების პარტნიორებისა და ორგანოებისთვის.

13. საერთო კრება გადაწყვეტილებას იღებს იმ საკითხზე, რომელიც კანონით და ამ წესდებით საერთო კრების უფლებამოსილებას განეკუთვნება. საერთო კრების უფლებამოსილება შეიძლება გაფართოვდეს პარტნიორთა გადაწყვეტილების საფუძველზე.

14. საერთო კრება იღებს გადაწყვეტილებას დირექტორის მიერ გაწეული მუშაობის მოწონების შესახებ. მოწონება იწვევს შეზღუდული პასუხისმგებლობის საზოგადოების მიერ ამ ორგანოების მიმართ ზიანის ანაზღაურების მოთხოვნის უფლებაზე უარის თქმას, თუ ეს უფლება აშკარა იქნებოდა საერთო კრებისთვის წარდგენილი დოკუმენტებისა და მიწოდებული ინფორმაციის გულმოდგინედ შემოწმების შემთხვევაში.

15. თუ საერთო კრებას ყველა პარტნიორი ესწრება და ისინი თანახმა არიან კრების ჩატარებასა და გადაწყვეტილების მიღებაზე, კრების ჩატარება შესაძლებელია იმ შემთხვევაშიც, თუ კრების მოწვევის კანონით ან/და ამ წესდებით დადგენილი წესები არ იქნა დაცული. პარტნიორის თანხმობად მიიჩნევა, თუ იგი არ მოითხოვს საერთო კრების სხვა დროს ჩატარებას მისი მოწვევის პროცედურის დარღვევის გამო.

16. საერთო კრების სათანადოდ მოწვევისა და ჩატარებისთვის პასუხისმგებელია ამ კრების მომწვევი ორგანო/პირი.

17. საერთო კრება გადაწყვეტილებაუნარიანია, თუკი მას ესწრება/ესწრებიან ხმების უმრავლესობის მქონე პარტნიორი/პარტნიორები. თუ საერთო კრება გადაწყვეტილებაუნარიანი არ არის, კრების მომწვევს შეუძლია იმავე წესითა და იმავე დღის წესრიგით ხელახლა მოიწვიოს კრება. მეორე კრება გადაწყვეტილებაუნარიანია მასზე დამსწრე ხმის უფლების მქონე პარტნიორთა რაოდენობის მიუხედავად. საზოგადოებაში ხმების რაოდენობა გამოითვლება შეზღუდული პასუხისმგებლობის საზოგადოების კაპიტალში წილის მიხედვით.

18. საერთო კრება გადაწყვეტილებას იღებს კენჭისყრაში მონაწილეთა ხმების უმრავლესობით, გარდა იმ შემთხვევისა, როდესაც კანონით ან ამ წესდებით განსაზღვრულია ხმათა უფრო დიდი რაოდენობა ან სხვა, დამატებითი პირობები.

19. საერთო კრებაზე შეიძლება მოწვეულ იქნენ აგრეთვე შეზღუდული პასუხისმგებლობის საზოგადოების დირექტორი და სხვა პირები.

20. შეზღუდული პასუხისმგებლობის საზოგადოების პარტნიორის მიერ ხმის მიცემისა და პარტნიორთა გადაწყვეტილების მიღებაში მონაწილეობის წესები და პირობები დგინდება ამ წესდებითა და „მეწარმეთა შესახებ“ საქართველოს კანონით. საერთო კრების მოწვევის შესახებ პარტნიორებისთვის გაგზავნილ დოკუმენტში ან პარტნიორთა გადაწყვეტილების პროექტში აუცილებელია, ხმის მიცემის წესებსა და პირობებზე მითითება.

21. პარტნიორს, რომელიც საერთო კრებაში არც პირადად და არც წარმომადგენლის მეშვეობით არ მონაწილეობს, შეუძლია ამ კრების ჩატარებამდე დისტანციურად, წერილობით, მისცეს ხმა მისი დღის წესრიგით გათვალისწინებულ საკითხებთან დაკავშირებით.

22. საერთო კრებაზე დამსწრე ან არმყოფი პარტნიორის მიერ ხმის ტექნიკური საშუალების გამოყენებით მიცემული ხმა მხოლოდ მაშინ იქნება გათვალისწინებული, თუ შესაძლებელია ხმის უფლების გამოყენების უფლებამოსილების მქონე პირისა და შესაბამისი წილების სარწმუნო იდენტიფიცირება. ნების ელექტრონული კომუნიკაციის საშუალებით გამოვლენისას აუცილებელია, იგი დადასტურდეს ნოტარიუსის მიერ ან კვალიფიციური ელექტრონული ხელმოწერით, საქართველოს კანონმდებლობით დადგენილი წესით.

23. ხმის უფლების გამოყენების უფლებამოსილების მქონე პირისა და შესაბამისი წილების სარწმუნო იდენტიფიცირებისთვის პასუხისმგებელი არიან საერთო კრების თავმჯდომარე და ამ კრების მომწვევი ორგანო.

24. საზოგადოების პარტნიორი საერთო კრებაში პირადად ან წარმომადგენლის მეშვეობით მონაწილეობს. წარმომადგენლობითი უფლებამოსილება (მინდობილობა) გაიცემა წერილობით, ერთ ან რამდენიმე საერთო კრებაზე წარმომადგენლობის ან გარკვეული ვადის განმავლობაში წარმომადგენლობის უფლებით.

25. საერთო კრებაში პარტნიორის წარმომადგენლის მეშვეობით მონაწილეობის თაობაზე უნდა ეცნობოს საერთო კრების მომწვევ ორგანოს და მას შესაბამისი მინდობილობა ამ კრების ჩატარებამდე ან კრების დაწყებისთანავე უნდა წარედგინოს.

26. საერთო კრების მოწვევის, მიმდინარეობისა და შედეგების შესახებ ამ კრების დასრულებიდან 15 დღის ვადაში დგება ოქმი, რომელსაც ხელს აწერს საერთო კრების მიერ არჩეული საერთო კრების თავმჯდომარე. კრების ოქმის ნამდვილობასა და მასში მითითებული ფაქტების სისწორეზე პასუხისმგებელია კრების თავმჯდომარე. კანონით გათვალისწინებულ შემთხვევებში, საერთო კრების ოქმს ადგენს და ამოწმებს ნოტარიუსი. საერთო კრების ოქმი დაუყოვნებლივ, შეზღუდული პასუხისმგებლობის საზოგადოების ხარჯზე ეგზავნება პარტნიორებს.

27. საერთო კრების ოქმში უნდა აღინიშნოს:

ა) შეზღუდული პასუხისმგებლობის საზოგადოების საფირმო სახელწოდება და საიდენტიფიკაციო ნომერი;

ბ) საერთო კრების ჩატარების ადგილი და თარიღი/დრო;

გ) მითითება საერთო კრების მოწვევის პროცედურის დაცვასა და ამ კრების გადაწყვეტილება უნარიანობაზე. ოქმს შეიძლება დაერთოს აღნიშნულ გარემოებებთან დაკავშირებული დოკუმენტები;

დ) ძირითად დოკუმენტში ან დანართის სახით – საერთო კრების მუშაობაში მონაწილე ან მასზე დამსწრე ხმის უფლების მქონე პარტნიორთა და სხვა დამსწრე პირთა ჩამონათვალი და საიდენტიფიკაციო მონაცემები. წარმომადგენლობის შემთხვევაში ოქმს უნდა დაერთოს წარმომადგენლობითი უფლებამოსილების დამადასტურებელი წერილობითი დოკუმენტი ან უნდა მიეთითოს ასეთ დოკუმენტზე, თუ მას შეზღუდული პასუხისმგებლობის საზოგადოება სხვა დოკუმენტებთან ერთად ინახავს;

ე) საერთო კრების თავმჯდომარის საიდენტიფიკაციო მონაცემები;

ვ) საერთო კრების დღის წესრიგი;

ზ) საერთო კრების გადაწყვეტილება. მასში მითითებული უნდა იყოს კენჭისყრის შედეგები;

თ) საერთო კრების მონაწილის მიერ კრებაზე მიღებული გადაწყვეტილების მიმართ განსხვავებული აზრის გამოთქმის ან საწინააღმდეგო პოზიციის გამოხატვის შემთხვევაში – კრების შესაბამისი მონაწილის ვინაობა და საწინააღმდეგო პოზიციის შინაარსი, თუ იგი მოითხოვს ამ აზრის/პოზიციის ოქმში შეტანას.

მუხლი 9. საერთო კრების უფლებამოსილება

1. პარტნიორთა გადაწყვეტილების მიღება აუცილებელია შემდეგ საკითხებზე:

ა) ფინანსური ანგარიშის დამტკიცება;

ბ) საზოგადოების ქონების პარტნიორთა შორის განაწილება;

გ) საზოგადოების მიერ საკუთარ კაპიტალში წილის შექმნა;

დ) წილებიდან ან წილების კლასებიდან გამომდინარე უფლებების ცვლილება;

ე) ფილიალების შექმნა და ლიკვიდაცია

ზ) ინვესტიციების დამტკიცება, რომელთა ღირებულება ცალკე ან ჯამურად ერთი სამეურნეო წლის განმავლობაში აღემატება საზოგადოების აქტივების ღირებულების 50%-ს;

თ) ვალდებულებათა ადგება, რომლებიც ცალკე ან მთლიანად, ერთ სამეურნეო წელიწადში აღემატება საზოგადოების აქტივების ღირებულების 50%-ს;

ი) ვალდებულებათა უზრუნველყოფა, რომლებიც არ მიეკუთვნებიან ჩვეულებრივ საწარმოო საქმიანობას და რომელთა ღირებულება აღემატება საზოგადოების აქტივების ღირებულების 50%-ს;

- კ) მინდობილობის გაცემა და გაუქმება;
- ლ) წლიური შედეგების დამტკიცება;
- მ) პარტნიორის გარიცხვა საზოგადოებიდან;
- ნ) პარტნიორის გასვლა საზოგადოებიდან;
- ო) დირექტორის თანამდებობაზე დანიშვნა, მასთან სასამართლო ხელშეკრულების დადება და მისი თანამდებობიდან გათავისუფლება;
- პ) სამეთვალყურეო საბჭოს შექმნა;
- ჟ) დირექტორის ანგარიშების დამტკიცება;
- რ) დირექტორის წინააღმდეგ მიმდინარე სასამართლო პროცესში მონაწილეობა (მათ შორის, ამ პროცესისთვის წარმომადგენლის დანიშვნა);
- ს) საზოგადოების რეორგანიზაცია;
- ტ) საზოგადოების დაშლა (ლიკვიდაცია);
- ნ) საზოგადოების სადამფუძნებლო შეთანხმებაში ცვლილება/წესდების ახალი რედაქციის მიღება.

2. პარტნიორთა გადაწყვეტილების მისაღებად აუცილებელია კენჭისყრაში მონაწილეთა ხმების ნახევარზე მეტი, თუ ამ წესდებით სხვა რამ არ არის გათვალისწინებული. პარტნიორის ხმების რაოდენობა გამოითვლება შეზღუდული პასუხისმგებლობის საზოგადოების კაპიტალში ამ პარტნიორის წილის მიხედვით.

3. შეზღუდული პასუხისმგებლობის საზოგადოების სადამფუძნებლო შეთანხმებაში ცვლილება/წესდების ახალი რედაქცია მიღებული უნდა იქნეს კენჭისყრაში მონაწილეთა ხმების 3/4-ის უმრავლესობით.

4. იმ გადაწყვეტილების მიღება, რომელიც ეხება წილების რომელიმე კლასთან (ასეთის არსებობის შემთხვევაში) დაკავშირებული უფლების ცვლილებას (მათ შორის, უფლების განხორციელების პროცედურის ცვლილებას), დამატებით საჭიროებს ცვლილებისადმი დაქვემდებარებული კლასის განთავსებულ წილებთან დაკავშირებული ხმების საერთო რაოდენობის, სულ მცირე, 3/4-ის მფლობელთა თანხმობას.

5. თუ პარტნიორი, მისაღები გადაწყვეტილების თანახმად, თავისუფლდება შეზღუდული პასუხისმგებლობის საზოგადოების წინაშე ნაკისრი ვალდებულებისგან, მისი ვალდებულების მოცულობა მცირდება, გადაწყვეტილება ეხება მასთან გარიგების დადებას ან მის წინააღმდეგ სარჩელის აღძვრას, მორიგებას ან სარჩელზე უარის თქმას, მას არ აქვს აღნიშნულ საკითხებთან დაკავშირებით ხმის მიცემის უფლება. მას ასევე არ აქვს უფლება სხვა პარტნიორის სახელით მისცეს ხმა, გარდა იმ შემთხვევისა, როდესაც მისი მინდობილობა ამ საკითხს ეხება.

6. საერთო კრების გადაწყვეტილება/ოქმი ნამდვილია, თუ:

- ა) საერთო კრება მოწვეულია უფლებამოსილი ორგანოს/პირის მიერ კანონმდებლობითა და ამ წესდებით დადგენილი წესით;
- ბ) საერთო კრების ოქმი დამოწმებულია კანონმდებლობით დადგენილი წესით;
- გ) საერთო კრების მოწვევის შესახებ ელექტრონული პორტალის სუბიექტის ავტორიზებული მომხმარებლის გვერდზე საჯაროდ გამოქვეყნებულ წერილობით შეტყობინებაში/პარტნიორებისთვის გაგზავნილ მოსაწვევეში მითითებულია საერთო კრების დღის წესრიგი, საზოგადოების საფირმო სახელწოდება, საერთო კრების ჩატარების ადგილი, თარიღი და დაწყების დრო;
- დ) დაცულია საერთო კრების ჩატარების შესახებ გადაწყვეტილების პარტნიორებისთვის შეტყობინების წესი;
- ე) საერთო კრებაზე განსახილველი საკითხი განეკუთვნება საერთო კრების უფლებამოსილებას;
- ვ) გადაწყვეტილება სადამფუძნებლო შეთანხმებაში ცვლილების/წესდების ახალი რედაქციის მიღების შესახებ არ ეწინააღმდეგება კანონს;
- ზ) გადაწყვეტილება არ ეწინააღმდეგება კანონის იმ ნორმებს, რომელთა უმთავრესი მიზანია კრედიტორთა უფლებების დაცვა;
- თ) გადაწყვეტილება არ ეწინააღმდეგება საჯარო წესრიგს ან ზნეობის ნორმებს.

7. საერთო კრების გადაწყვეტილება/ოქმი საჩივრდება სასამართლოში.

8. დირექტორი ვალდებულია საერთო კრების გადაწყვეტილების ბათილობის თაობაზე სასამართლოს კანონიერ ძალაში შესული გადაწყვეტილება დაუყოვნებლივ წარუდგინოს მარეგისტრირებელ ორგანოს, თუ საერთო კრების გასაჩივრებელი გადაწყვეტილების საფუძველზე უკვე განხორციელდა რეგისტრაცია.

9. დირექტორი ვალდებულია არიან საერთო კრების გადაწყვეტილების ან მისი ნაწილის ბათილობის თაობაზე სასამართლოს გადაწყვეტილების შესახებ ინფორმაცია დაუყოვნებლივ განათავსონ შეზღუდული პასუხისმგებლობის საზოგადოების ვებგვერდზე ან სხვაგვარად მიაწოდონ პარტნიორებს.

მუხლი 10. ხელმძღვანელი ორგანო

1. შეზღუდული პასუხისმგებლობის საზოგადოებას ხელმძღვანელობს და მესამე პირებთან ურთიერთობაში წარმომადგენს ხელმძღვანელი ორგანო, რომელიც შედგება ერთი ან რამდენიმე დირექტორისგან. რამდენიმე დირექტორის არსებობის შემთხვევაში, მათი ხელმძღვანელობისა და წარმომადგენლობითი უფლებამოსილების ფარგლები (სრული, ერთპიროვნული, ერთობლივი და ა.შ.) განისაზღვრება სადამფუძნებლო შეთანხმებით.

2. საზოგადოების დირექტორი შეიძლება იყოს ნებისმიერი პირი, რომელიც აკმაყოფილებს „ფასიანი ქაღალდების ბაზრის შესახებ“ საქართველოს კანონისა და „საბროკერო კომპანიის ლიცენზირებისა და რეგულირების წესის დამტკიცების თაობაზე“ საქართველოს ეროვნული ბანკის პრეზიდენტის 2018 წლის 5 ივლისის N145/04 ბრძანების შესაბამისად განსაზღვრულ კრიტერიუმებს.
3. დირექტორი ვალდებულია ხელმძღვანელობითი და წარმომადგენლობითი უფლებამოსილებების განხორციელებისას პარტნიორთა გადაწყვეტილებას დაემორჩილოს.
4. დირექტორის უფლებამოსილებებს განეკუთვნება:
 - a) საზოგადოების საერთო ადმინისტრაციული, ტექნიკური და ოპერატიული ხელმძღვანელობა;
 - b) საზოგადოების ინტერესების წარმოდგენა მესამე პირებთან ურთიერთობებში, თავისი უფლებამოსილებების ფარგლებში;
 - c) საერთო კრების გადაწყვეტილებათა შესრულება და მათ შესრულებაზე კონტროლი;
 - d) საზოგადოების მიმდინარე და სამომავლო გეგმების/ პროგრამების შესრულების უზრუნველყოფა;
 - e) წერილობითი მინდობილობების/რწმუნებულებების გაცემა სხვა პირებზე საზოგადოების წარმოდგენის მიზნით;
 - f) „ფასიანი ქაღალდების ბაზრის შესახებ“ საქართველოს კანონით, საზოგადოების ლიცენზიითა და ამ წესდებით საბროკერო კომპანიის უფლებამოსილებას მიკუთვნებული საქმიანის აღსრულებაზე/აღსრულების პროცესზე მონიტორინგის განხორციელება;
 - g) საზოგადოების ქონების მართვა, მისი ფულადი და სალიკვიდაციო სახსრების ჩათვლით და საერთო კრების მიერ განსაზღვრული უფლებამოსილებების ფარგლებში;
 - h) კონტროლის განხორციელება საზოგადოების საბუღალტრო აღრიცხვასა და საფინანსო საქმიანობაზე;
 - i) საზოგადოების სახელით საბანკო ანგარიშების გახსნა და დახურვა, საზოგადოების ნებისმიერ ვალუტაში არსებული დეპოზიტების/ანაზრის ხელშეკრულებების გაფორმება/გაუქმება და შესაბამისი სახის ცვლილებების შეტანა (მათ შორის მოქმედების ვადის გაგრძელება);
 - j) საზოგადოების სახელით იპოთეკის, გირავნობისა და თავდებობის ხელშეკრულებების დადება;
 - k) აუდიტორის არჩევა;
 - l) საზოგადოების თანამშრომლების სამუშაოზე მიღება და გათავისუფლება, მათთან შრომითი ხელშეკრულებების დადება და შეწყვეტა.
 - m) ამ წესდებით გათვალისწინებული სხვა უფლებამოსილებები

5. დირექტორი უფლებამოსილია გადაწყვეტილება მიიღოს ყველა იმ საკითხზე, რომელიც, კანონის ან ამ წესდების თანახმად, არ განეკუთვნება პარტნიორთა კომპეტენციას. ამასთანავე, საერთო კრება უფლებამოსილია კენჭისყრაში მონაწილეთა ხმების 3/4-ის უმრავლესობით მიიღოს გადაწყვეტილება ნებისმიერ საკითხზე.

6. დირექტორთან ურთიერთობის შინაარსი და მისი საქმიანობის ანაზღაურება განისაზღვრება „მეწარმეთა შესახებ“ საქართველოს კანონითა და სასამსახურო ხელშეკრულებით, რომელსაც ხელმძღვანელ პირთან დებს საერთო კრება.

7. დირექტორის გარდაცვალების, თანამდებობიდან გადადგომის ან მისი უფლებამოსილების სხვაგვარად შეწყვეტის შემთხვევაში პარტნიორებმა ახალი დირექტორი 1 თვის ვადაში უნდა აირჩიონ.

8. თუ ხელშეკრულების დადებისას კონტრაქტისთვის ცნობილი იყო შეზღუდული პასუხისმგებლობის საზოგადოების დირექტორის უფლებამოსილების შეზღუდვის შესახებ, საზოგადოებას აქვს ამ ხელშეკრულების შეცვლის უფლება. იგივე წესი გამოიყენება, თუ წარმომადგენლობითი უფლებამოსილების მქონე პირი და კონტრაქტი განზრახ მოქმედებენ ერთად, რათა ზიანი მიაღდგეს იმ სამეწარმეო საზოგადოებას, რომლის სახელითაც მოქმედებს წარმომადგენლობითი უფლებამოსილების მქონე პირი.

9. თუ საერთო კრება ვერ დანიშნავს დირექტორს, რითაც შეზღუდული პასუხისმგებლობის საზოგადოების საქმიანობას არსებითი საფრთხე ექმნება, ერთ-ერთი პარტნიორის ან კრედიტორის განცხადების საფუძველზე სასამართლო ნიშნავს დირექტორის მოვალეობის შემსრულებელს იმ ვადით, რომელიც საჭიროა საერთო კრების მიერ ახალი წევრის დანიშვნისთვის.

10. საზოგადოების დირექტორს თანამდებობაზე ნიშნავს და თანამდებობიდან ათავისუფლებს საერთო კრება.

11. დირექტორი თანამდებობაზე ინიშნება 3 წლის ვადით, ხელახლა დანიშვნის უფლებით. თუ ამ ვადის ამოწურვის შემდეგ კანონით დადგენილი წესით არ განხორციელდება დირექტორის უფლებამოსილების ახალი ვადის ან დირექტორის ცვლილების რეგისტრაცია, დირექტორის უფლებამოსილება განუსაზღვრელი ვადით გაგრძელდება მიიჩნევა.

12. დირექტორს უფლება აქვს გადადგეს თანამდებობიდან. ასეთ შემთხვევაში ხელმძღვანელი ვალდებულია დაიცვას საზოგადოებასთან დადებული სასამსახურო ხელშეკრულებითა და მოქმედი კანონმდებლობით განსაზღვრული მოთხოვნები და პროცედურები.

მუხლი 11. საზოგადოების ხელმძღვანელობის ზოგადი პრინციპები

1. დირექტორი ვალდებულია შეზღუდული პასუხისმგებლობის საზოგადოების საქმეებს გაუძღვეს მართლზომიერად და კეთილსინდისიერი ხელმძღვანელის გულისხმიერებით, კერძოდ, მასზე ისე ზრუნავდეს, როგორც ანალოგიურ პირობებში უნდა

ეზრუნა/ემოქმედა ჩვეულებრივ, საღად მოაზროვნე პირს, იმ რწმენით, რომ მისი ეს მოქმედება საზოგადოებისთვის ეკონომიკურად ყველაზე ხელსაყრელია.

2. დირექტორი შეზღუდული პასუხისმგებლობის საზოგადოების წინაშე პასუხს აგებს კეთილსინდისიერების მოვალეობის ბრალეული შეუსრულებლობით მიყენებული ზიანისთვის. დაუშვებელია შეიზღუდოს დირექტორის პასუხისმგებლობა ამ მოვალეობის განზრახ შეუსრულებლობისთვის.

3. დირექტორის მიერ შეზღუდული პასუხისმგებლობის საზოგადოებისთვის მიყენებული ზიანის ანაზღაურების მოთხოვნის უფლება აქვს სხვა დირექტორს (ასეთის არსებობის შემთხვევაში), ხოლო კანონით გათვალისწინებულ შემთხვევაში და დადგენილი წესით – თითოეულ პარტნიორს.

4. დირექტორი თავისუფლდება პასუხისმგებლობისგან, თუ იგი თავისი ქმედებით საერთო კრების გადაწყვეტილებას ასრულებს, გარდა იმ შემთხვევისა, როდესაც მან საერთო კრების გადაწყვეტილების მიღებას ხელი შეუწყო არასწორი ინფორმაციის მიწოდებით ან იცოდა, რომ ამ გადაწყვეტილების მიღება ზიანს გამოიწვევდა, მაგრამ ამის თაობაზე არ შეატყობინა საერთო კრებას გადაწყვეტილების მიღებამდე ან აღსრულებამდე.

5. თუ გარიგების ღირებულება შეზღუდული პასუხისმგებლობის საზოგადოების აქტივების საბალანსო ღირებულების 50 პროცენტს აღემატება, გარიგება საერთო კრებამ უნდა დაამტკიცოს.

6. თუ შეზღუდული პასუხისმგებლობის საზოგადოება გადახდისუუნაროა ან გადახდისუუნარობის საშიშროების წინაშე დგას, დირექტორმა ბრალეული გაკიანურების გარეშე, მაგრამ გადახდისუუნარობის დადგომის მომენტიდან არაუგვიანეს 3 კვირისა, უნდა განაცხადოს გადახდისუუნარობის თაობაზე „რეაბილიტაციისა და კრედიტორთა კოლექტიური დაკმაყოფილების შესახებ“ საქართველოს კანონით დადგენილი წესით. გადახდისუუნარობის შესახებ განცხადება ბრალეულად გაკიანურებულს არ არის, თუ დირექტორი ზრუნვის მოვალეობას ჯეროვნად ასრულებს.

7. ზრუნვის მოვალეობა არ არის დარღვეული და დირექტორი არ არის ვალდებული, აანაზღაუროს ის ზიანი, რომელიც შეზღუდული პასუხისმგებლობის საზოგადოებას მის მიერ მიღებული სამეწარმეო გადაწყვეტილებით მიაღება, თუ დირექტორს გონივრულად შეეძლო ევარაუდა, რომ იგი სამეწარმეო გადაწყვეტილებას საკმარისი და სანდო ინფორმაციის საფუძველზე, საზოგადოების ინტერესებიდან გამომდინარე, დამოუკიდებლად და ინტერესთა კონფლიქტის ან სხვათა ზეგავლენის გარეშე იღებდა. აღნიშნული წესი არ გამოიყენება იმ შემთხვევაში, როდესაც სამეწარმეო გადაწყვეტილება კანონით ან ამ წესდებით გათვალისწინებული მოვალეობების დარღვევით არის მიღებული.

8. დირექტორს არ აქვს უფლება, შეზღუდული პასუხისმგებლობის საზოგადოების თანხმობის გარეშე განახორციელოს იგივე საქმიანობა, რომელსაც ახორციელებს შეზღუდული პასუხისმგებლობის საზოგადოება, ან იყოს იმავე სფეროში მოქმედი სხვა სამეწარმეო საზოგადოების დირექტორი. დირექტორთან დადებული სასამსახურო ხელშეკრულებით აღნიშნული ვალდებულება შეიძლება ძალაში დარჩეს მისი თანამდებობიდან გათავისუფლების შემდეგაც, მაგრამ არაუმეტეს 3 წლის ვადით. ამ ვალდებულების დარღვევისთვის შესაძლებელია გათვალისწინებულ იქნეს კომპენსაცია. მისი ოდენობა და გადახდის წესი განისაზღვრება სასამსახურო ხელშეკრულებით ან მხარეთა დამატებითი შეთანხმებით. კონკურენციის აკრძალვის წესის დარღვევის შემთხვევაში საზოგადოებას შეუძლია დამრღვევს, მისთვის მიყენებული ზიანისთვის კომპენსაციასთან ერთად, შეთანხმებული პირგასამტეხლოს გადახდაც მოსთხოვოს. მას ასევე შეუძლია დამრღვევს კომპენსაციის ნაცვლად მოსთხოვოს საკუთარი ან მესამე პირის სახელით დადებული გარიგებიდან დამრღვევის მიერ მიღებული სარგებლის შეზღუდული პასუხისმგებლობის საზოგადოებისთვის გადაცემა ან ამგვარი სარგებლის მიღების უფლების დათმობა. ამ უფლების გამოყენება შეუძლია დირექტორს, ხოლო კანონით გათვალისწინებულ შემთხვევაში – თითოეულ პარტნიორს.

9. შეზღუდული პასუხისმგებლობის საზოგადოებაში ამ მუხლის მე-8 პუნქტით გათვალისწინებული საქმიანობის განხორციელებაზე თანხმობის გაცემა შეუძლია საერთო კრებას. აღნიშნული თანხმობა შეიძლება გაიცეს როგორც ზოგადად, ისე კონკრეტულ საქმიანობაზე, გარიგების სახესა და სამეწარმეო საზოგადოებაში მონაწილეობაზე. თანხმობის გაცემაზე დაუსაბუთებლად უარის თქმა დაუშვებელია. საქმიანობის განხორციელებაზე თანხმობა გაცემულად მიიჩნევა, თუ საზოგადოების დირექტორის დანიშვნისას პარტნიორებმა იცოდნენ, რომ საზოგადოების დირექტორი ახორციელებდა აღნიშნულ საქმიანობას, მაგრამ მისთვის ამ საქმიანობის შეწყვეტა არ მოუთხოვიათ.

10. დირექტორს არ აქვს უფლება შეზღუდული პასუხისმგებლობის საზოგადოების წინასწარი თანხმობის გარეშე, პირადი სარგებლის ან, ამ საზოგადოების გარდა, სხვა პირთა მიერ სარგებლის მისაღებად ისარგებლოს საზოგადოების საქმიანობის სფეროსთან დაკავშირებული საქმიანი შესაძლებლობით, რომელიც მისთვის ხელმისაწვდომი გახდა მოვალეობის შესრულებისას ან თანამდებობრივი მდგომარეობიდან გამომდინარე და რომელიც, გონივრული თვალსაზრისით, საზოგადოების ინტერესის საგანი შეიძლება ყოფილიყო. საზოგადოების წინასწარი თანხმობის მიღება საჭირო არ არის, თუ საერთო კრებამ უკვე იმსჯელა აღნიშნულ შესაძლებლობაზე და უარი თქვა მის გამოყენებაზე. ეს ვალდებულება ძალაში რჩება დირექტორს თანამდებობიდან გათავისუფლებიდან არაუმეტეს 3 წლისა. დირექტორთან დადებული სასამსახურო ხელშეკრულებით შეიძლება უფრო მცირე ვადა დადგინდეს. საქმიანი შესაძლებლობით სარგებლობაზე წინასწარი თანხმობის გაცემა შეუძლია საერთო კრებას.

11. საქმიანი შესაძლებლობის მითვისების აკრძალვის წესის დარღვევის შემთხვევაში შეზღუდული პასუხისმგებლობის საზოგადოებას შეუძლია დამრღვევს მოსთხოვოს ამ დარღვევით საზოგადოებისთვის მიყენებული ზიანის (მათ შორის, მიუღებელი შემოსავლის) ანაზღაურება. საზოგადოებას შეუძლია დამრღვევს ზიანის ანაზღაურების ნაცვლად მოსთხოვოს

საკუთარი ან მესამე პირის სახელით დადებული გარიგებიდან დამრღვევის მიერ მიღებული სარგებლის საზოგადოებისთვის გადაცემა ან ამგვარი სარგებლის მიღების უფლების დათმობა. ამ მოთხოვნის უფლების გამოყენება შეუძლია დირექტორს, ხოლო კანონით გათვალისწინებულ შემთხვევაში – თითოეულ პარტნიორს.

12. ვალდებულების რამდენიმე დირექტორის მოქმედებით ან უმოქმედობით შეუსრულებლობის შემთხვევაში ისინი შეზღუდული პასუხისმგებლობის საზოგადოების წინაშე პასუხს სოლიდარულად აგებენ.

13. საერთო კრებას შეუძლია მიიღოს გადაწყვეტილება დირექტორის მიერ შეზღუდული პასუხისმგებლობის საზოგადოებისთვის მიყენებული ზიანის ანაზღაურების მოთხოვნაზე უარის თქმის ან მასთან მორიგების თაობაზე, თუ ამ გადაწყვეტილებას არ შეეწინააღმდეგებიან ხმათა, სულ მცირე, 10 პროცენტის მესაკუთრე პარტნიორები. დირექტორი ასევე თავისუფლდება საზოგადოებისთვის მიყენებული ზიანის ანაზღაურების ვალდებულებისგან, თუ იგი თავისი ქმედებით საერთო კრების გადაწყვეტილებას ასრულებდა. დირექტორს, რომლის სამეწარმეო საზოგადოებისთვის მიყენებული ზიანის ანაზღაურების ვალდებულებისგან გათავისუფლების საკითხი განიხილება, ეკრძალება ამ საკითხზე კენჭისყრისას ხმის მიცემა.

14. დირექტორთან დადებული სასამსახურო ხელშეკრულებით არ შეიძლება გამოირიცხოს დირექტორის პასუხისმგებლობა მის მიერ ვალდებულების განზრახ შეუსრულებლობით საზოგადოებისთვის მიყენებული ზიანისთვის.

მუხლი 12. პარტნიორის გასვლა

1. პარტნიორს უფლება აქვს გავიდეს შეზღუდული პასუხისმგებლობის საზოგადოებიდან, თუ საზოგადოების დირექტორის ან პარტნიორთა ქმედებები მნიშვნელოვნად აზიანებს მის ინტერესებს, ან არსებობს შემდეგი მნიშვნელოვანი საფუძველები:

ა) საზოგადოების საქმიანობის საგანი მნიშვნელოვნად შეიცვალა;

ბ) საზოგადოებას ბოლო 3 წლის განმავლობაში არ გაუნაწილებია დივიდენდი, მიუხედავად იმისა, რომ საზოგადოების ფინანსური მდგომარეობა ამის საშუალებას იძლეოდა;

გ) საზოგადოებამ მიიღო „მეწარმეთა შესახებ“ საქართველოს კანონით გათვალისწინებული წესით, წილების კლასების (ასეთის არსებობის შემთხვევაში) ცვლილებასთან დაკავშირებული გადაწყვეტილება;

დ) სხვა პარტნიორებმა მიიღეს გადაწყვეტილება დამატებითი შენატანის განხორციელების ვალდებულების შესახებ, რომელიც მასზეც ვრცელდება.

2. თუ ამ მუხლის პირველ პუნქტში დასახელებული გარემოებების წარმოშობის საფუძველია პარტნიორთა გადაწყვეტილება, პარტნიორს გასვლის უფლება მხოლოდ იმ შემთხვევაში წარმოეშობა, თუ მას გადაწყვეტილებისთვის მხარი არ დაუჭერია.

3. პარტნიორმა შეზღუდული პასუხისმგებლობის საზოგადოებას წერილობით უნდა შეატყობინოს საზოგადოებიდან გასვლისა და გასვლის მიზეზების თაობაზე. შეტყობინების მიღებისთანავე საზოგადოების დირექტორი პარტნიორებს აცნობებს პარტნიორის გასვლის შესახებ, რის შემდეგაც პარტნიორები იღებენ გადაწყვეტილებას გასვლის მსურველი პარტნიორისათვის გასვლაზე თანხმობის მიცემის, ასევე მისი წილის შეზღუდული პასუხისმგებლობის საზოგადოებისთვის გადაცემის, დანარჩენ პარტნიორებზე პროპორციულად გადანაწილების ან გაუქმების თაობაზე.

4. თუ შესაბამისი შეტყობინების მიღებიდან 30 დღის ვადაში პარტნიორები არ მიიღებენ ამ მუხლის მე-3 პუნქტით გათვალისწინებულ გადაწყვეტილებებს ან გადაწყვეტილებით უარს იტყვიან პარტნიორის გასვლაზე თანხმობის გაცემაზე, დირექტორი ამის შესახებ დაუყოვნებლივ აცნობებს გასვლის მსურველ პარტნიორს. თუ ხელმძღვანელი ორგანო შესაბამისი შეტყობინების მიღებიდან 30 დღის ვადაში არ აცნობებს გასვლის მსურველ პარტნიორს პარტნიორთა რაიმე გადაწყვეტილების შესახებ, ჩათვლება, რომ პარტნიორებმა პარტნიორის გასვლაზე თანხმობის გაცემაზე უარი განაცხადეს.

5. გასვლის მსურველი პარტნიორის წილის ღირებულება უნდა დადგინდეს მხარეთა შეთანხმებით, ხოლო ამგვარი შეთანხმების შეუძლებლობის შემთხვევაში – მხარეების მიერ დანიშნული დამოუკიდებელი აუდიტორის მიერ. თუ მხარეები ვერ თანხმდებიან აუდიტორის კანდიდატურაზე, დამოუკიდებელ აუდიტორს, ერთ-ერთი მხარის განცხადების საფუძველზე, ნიშნავს სასამართლო.

6. აუდიტორის მომსახურების ანაზღაურება მხარეებს ეკისრებათ თანაბრად და ისინი აუდიტორის წინაშე სოლიდარულად აგებენ პასუხს მომსახურების ღირებულების ანაზღაურებისთვის, თუ მხარეთა შეთანხმებით სხვა რამ არ არის გათვალისწინებული.

7. პარტნიორის შეზღუდული პასუხისმგებლობის საზოგადოებიდან გასვლის შესახებ გადაწყვეტილებას, პარტნიორის განცხადების საფუძველზე, იღებს სასამართლო ამ მუხლის პირველ პუნქტში მითითებული გარემოებების არსებობის შემთხვევაში. აღნიშნული განცხადების წარდგენა დასაშვებია პარტნიორთა მიერ ამ მუხლის მე-4 პუნქტით გათვალისწინებული გადაწყვეტილების მიღებიდან 30 დღის განმავლობაში ან, თუ გადაწყვეტილება არ იქნა მიღებული, 30 დღიანი ვადის უშუალოდ გასვლიდან 30 დღის განმავლობაში. სასამართლო ასევე განსაზღვრავს გამსვლელი პარტნიორის წილის ღირებულებას და მისთვის წილის ღირებულების ანაზღაურების ვადას, რომელიც არ უნდა აღემატებოდეს სასამართლო გადაწყვეტილების ძალაში შესვლიდან 30 დღეს.

8. გამსვლელ პარტნიორს წილის ღირებულება უნდა აუნაზღაურდეს:

ა) ანაზღაურების ოდენობის შესახებ მხარეთა შეთანხმებიდან 15 დღის განმავლობაში, თუ მხარეები სხვა ვადაზე არ შეთანხმებულან;

- ბ) დამოუკიდებელი აუდიტორის მიერ მხარეთათვის წერილობითი დასკვნის წარდგენიდან 30 დღის განმავლობაში;
გ) სასამართლოს მიერ განსაზღვრულ ვადაში.

მუხლი 13. პარტნიორის გარიცხვა

1. მნიშვნელოვანი საფუძვლის არსებობის შემთხვევაში, პარტნიორთა გადაწყვეტილებით, შეზღუდული პასუხისმგებლობის საზოგადოების სარჩელის საფუძველზე, სასამართლოს შეუძლია მიიღოს გადაწყვეტილება პარტნიორის შეზღუდული პასუხისმგებლობის საზოგადოებიდან გარიცხვის თაობაზე.
2. მნიშვნელოვანი საფუძველი არსებობს, როდესაც პარტნიორის ქმედება მნიშვნელოვან ზიანს აყენებს შეზღუდული პასუხისმგებლობის საზოგადოების ინტერესებს ან მისი პარტნიორად დარჩენა საზიანოა საზოგადოების შემდგომი საქმიანობისთვის, თუ პარტნიორი საზოგადოებამ წერილობით უშედეგოდ გააფრთხილა საზოგადოების ინტერესების დამაზიანებელი ქმედების შეწყვეტისა და შესაძლო გარიცხვის შესახებ.
3. ამ მუხლის პირველი პუნქტით გათვალისწინებული პარტნიორთა გადაწყვეტილება მიიღება კენჭისყრაში მონაწილე ხმათა უმრავლესობით, მაგრამ არანაკლებ საზოგადოების წილთა საერთო ოდენობის ნახევრისა, რომელიც იძლევა ამ საკითხზე კენჭისყრაში მონაწილეობის უფლებას. ამ შემთხვევაში პარტნიორს, რომლის წინააღმდეგაც უნდა იქნეს მიღებული გადაწყვეტილება, არ აქვს ხმის უფლება. ისეთ შეზღუდული პასუხისმგებლობის საზოგადოებაში, რომელსაც ჰყავს ორი პარტნიორი, გადაწყვეტილება მიიღება მეორე პარტნიორის მიერ წერილობითი ფორმით. გადაწყვეტილება დამოწმებული უნდა იყოს მოქმედი კანონმდებლობის შესაბამისად.
4. ამ მუხლის პირველი პუნქტით გათვალისწინებული სარჩელით შეზღუდული პასუხისმგებლობის საზოგადოებას შეუძლია მიმართოს სასამართლოს პარტნიორთა შესაბამისი გადაწყვეტილების მიღებიდან 30 დღის ვადაში.
5. შეზღუდული პასუხისმგებლობის საზოგადოების მოთხოვნით, სასამართლოს აქტის საფუძველზე, საქმეზე საბოლოო გადაწყვეტილების მიღებამდე, პარტნიორს შეიძლება შეუჩერდეს ხმის ან სხვა არაქონებრივი უფლებები.
6. სასამართლოს მიერ პარტნიორის შეზღუდული პასუხისმგებლობის საზოგადოებიდან გარიცხვის შესახებ გადაწყვეტილების მიღების შემთხვევაში აღნიშნული გადაწყვეტილება უნდა იქნეს წარდგენილი სარეგისტრაციოდ.
7. გარიცხული პარტნიორის წილების სხვა პარტნიორებზე პროპორციულად გადანაწილების შესახებ გადაწყვეტილებას იღებს საერთო კრება.
8. გარიცხულ პარტნიორს უნდა აუნაზღაურდეს წილის სამართლიანი ფასი „მეწარმეთა შესახებ“ საქართველოს კანონის შესაბამისად.

მუხლი 14. შეზღუდული პასუხისმგებლობის საზოგადოების დაშლა და რეორგანიზაცია

1. შეზღუდული პასუხისმგებლობის საზოგადოების დაშლის საფუძველებია:
 - ა) საზოგადოების პარტნიორთა გადაწყვეტილება შეზღუდული პასუხისმგებლობის საზოგადოების დაშლის შესახებ;
 - ბ) საზოგადოების პარტნიორთა სავალდებულო რაოდენობასთან დაკავშირებით კანონით დადგენილი მოთხოვნის დარღვევა;
 - გ) იურიდიული პირის ლიკვიდაციის შესახებ სისხლის სამართლის საქმეზე სასამართლოს განაჩენის კანონიერ ძალაში შესვლა;
 - დ) საზოგადოების პარტნიორის განცხადების/სარჩელის საფუძველზე სასამართლოს მიერ მიღებული გადაწყვეტილება შეზღუდული პასუხისმგებლობის საზოგადოების დაშლის შესახებ.
2. საზოგადოების დაშლა ხორციელდება „მეწარმეთა შესახებ“ საქართველოს კანონით დადგენილი წესით.
3. მნიშვნელოვანი საფუძვლის არსებობისას, პარტნიორის განცხადების/სარჩელის საფუძველზე შეზღუდული პასუხისმგებლობის საზოგადოება შეიძლება დაიშალოს სასამართლოს გადაწყვეტილებით. მნიშვნელოვანი საფუძველი არსებობს, თუ ერთ-ერთმა პარტნიორმა განზრახ ან უხეში გაუფრთხილებლობით დაარღვია კანონით ან ამ წესდებით მისთვის დაკისრებული არსებითი მოვალეობა, ან თუ პარტნიორი მოვალეობას ვეღარ ასრულებს და შეზღუდული პასუხისმგებლობის საზოგადოების მიზანი ვეღარ მიიღწევა.
4. პარტნიორს შეუძლია შეზღუდული პასუხისმგებლობის საზოგადოების დაშლის შესახებ განცხადების სასამართლოში შემტანი პარტნიორის წილი სასამართლოს მეშვეობით სამართლიან ფასად გამოსყიდოს განცხადების შეტანიდან 30 დღის განმავლობაში. ამ შემთხვევაში ყოველ პარტნიორს უნდა მიეცეს თავისი წილის პროპორციულად გამოსყიდვაში მონაწილეობის შესაძლებლობა, თუ დანარჩენი პარტნიორები წილების გადანაწილების სხვა წესზე არ შეთანხმდებიან.
5. დასაშვებია, შეზღუდული პასუხისმგებლობის საზოგადოების რეორგანიზაცია განხორციელდეს შემდეგი ფორმებით:
 - ა) საზოგადოების გარდაქმნა;
 - ბ) სხვა სამეწარმეო საზოგადოებასთან შერწყმა (მიერთება ან გაერთიანება);
 - გ) საზოგადოების გაყოფა (დაყოფა ან გამოყოფა).
6. საზოგადოების რეორგანიზაცია ხორციელდება „მეწარმეთა შესახებ“ საქართველოს კანონით დადგენილი წესით.
7. შეზღუდული პასუხისმგებლობის საზოგადოების დაშლისა და რეორგანიზაციის პროცესში უნდა იქნეს გათვალისწინებული „მეწარმეთა შესახებ“ საქართველოს კანონით განსაზღვრული პარტნიორთა უფლებები და მოვალეობები.

8. შეზღუდული პასუხისმგებლობის საზოგადოების ლიკვიდაციის პროცესს ხელმძღვანელობს დირექტორი, რომელიც ინიშნება ლიკვიდატორად, გარდა იმ შემთხვევისა, როდესაც საერთო კრების გადაწყვეტილება ლიკვიდატორებად სხვა პირების დანიშვნას ითვალისწინებს.
9. ლიკვიდატორმა მარეგისტრირებელი ორგანოს ერთიანი ელექტრონული პორტალის სუბიექტის ავტორიზებულ გვერდზე (ელექტრონულ მისამართზე) ან თავიას ვებგვერდზე განცხადების გამოქვეყნებით დაუყოვნებლივ უნდა შეატყობინოს კრედიტორებს შეზღუდული პასუხისმგებლობის საზოგადოების დაშლის შესახებ და უნდა მოიწვიონ ისინი მოთხოვნების განსაცხადებლად.
10. ლიკვიდატორი უნდა აკმაყოფილებდეს სამეწარმეო საზოგადოების დირექტორისთვის წაყენებულ მოთხოვნებს.
11. საერთო კრება უფლებამოსილია ნებისმიერ მომენტში გაათავისუფლოს ლიკვიდატორი, გარდა იმ შემთხვევისა, როდესაც ლიკვიდატორი სასამართლოს მიერ არის დანიშნული.
12. დირექტორი ვალდებულია მარეგისტრირებელ ორგანოს მიმართოს განცხადებით ლიკვიდატორების მეწარმეთა და არასამეწარმეო (არაკომერციული) იურიდიული პირების რეესტრში რეგისტრაციის მიზნით. მარეგისტრირებელი ორგანოსთვის ამ განცხადებით მიმართვის უფლება აქვს პარტნიორს. აღნიშნულ განცხადებას უნდა ერთოდეს კანონმდებლობის შესაბამისად დამოწმებული დოკუმენტი ლიკვიდატორის დანიშვნის ან გათავისუფლების და მისი უფლებამოსილების შესახებ, ლიკვიდატორის ხელმოწერის ნიმუში, ხოლო თუ ლიკვიდატორი დირექტორი არ არის – აგრეთვე ლიკვიდატორის თანხმობა. ლიკვიდატორის ან მისი უფლებამოსილების ყოველი ცვლილებისას მეწარმეთა და არასამეწარმეო (არაკომერციული) იურიდიული პირების რეესტრში ცვლილების რეგისტრაციის მიზნით განცხადებას წარადგენენ ლიკვიდატორები.
13. ლიკვიდაციასთან დაკავშირებული საქმიანობის განხორციელებისას ლიკვიდატორები სარგებლობენ იმავე უფლებებით და ეკისრებათ იგივე მოვალეობები, რომლებიც აქვს დირექტორს, გარდა კონკურენციის აკრძალვისა. ლიკვიდატორებზე ვრცელდება განსაკუთრებულ ვითარებაში ზრუნვის მოვალეობა. ლიკვიდატორები ვალდებული არიან დაასრულონ მიმდინარე საქმეები, მოახდინონ აქტივების რეალიზაცია და შეასრულონ შეზღუდული პასუხისმგებლობის საზოგადოების ვალდებულებები. ლიკვიდატორებს უფლება აქვთ, დადონ ახალი გარიგებები, თუ ეს ლიკვიდაციისთვის აუცილებელია.
14. ლიკვიდაციის პროცესში მყოფი შეზღუდული პასუხისმგებლობის საზოგადოების ქონება ნაწილდება პარტნიორთა შორის, მათ წილებთან დაკავშირებული უფლებების შესაბამისად.
15. თუ შენატანები სრულად არ იყო განხორციელებული, თავდაპირველად ბრუნდება შენატანები ან მათი ღირებულება, ხოლო ნარჩენი ქონება ნაწილდება პარტნიორთა წილებთან დაკავშირებული უფლებების შესაბამისად.
16. თუ ქონება შენატანების დასაბრუნებლად საკმარისი არ არის, ნარჩენი ქონება ნაწილდება წილებთან დაკავშირებული უფლებების შესაბამისად, ხოლო თუკი შენატანები სრულად არ იყო განხორციელებული – განხორციელებული შენატანების პროპორციულად.
17. ქონება შეიძლება განაწილდეს მხოლოდ შეზღუდული პასუხისმგებლობის საზოგადოების ვალდებულებების დაფარვიდან და საზოგადოების დაშლის შესახებ განცხადების გამოქვეყნებიდან 5 თვის შემდეგ. სასამართლოს გადაწყვეტილების საფუძველზე ქონება შეიძლება განაწილდეს საზოგადოების დაშლის შესახებ განცხადების გამოქვეყნებიდან 3 თვის შემდეგ, თუ არსებობს დამოუკიდებელი აუდიტორის დასკვნა, რომ ყველა ვალდებულება შესრულებულია და, არსებული ვითარებიდან გამომდინარე, ქონების განაწილება საფრთხეს არ უქმნის მესამე პირთა უფლებებს.
18. თუ ცნობილი კრედიტორები არ განაცხადებენ თავიანთი მოთხოვნების შესახებ, ქონება შეიძლება განაწილდეს მხოლოდ მათი მოთხოვნების შესაბამისი ღირებულების სასამართლოს ან ნოტარიუსის სადეპოზიტო ანგარიშზე განთავსების შემდეგ.
19. თუ ვალდებულება სადავოა ან მისი შესრულების ვადა არ დამდგარა, ქონება შეიძლება მხოლოდ იმ შემთხვევაში განაწილდეს, თუკი კრედიტორს წარედგინება ვალდებულების ტოლფასი უზრუნველყოფა.
20. პარტნიორთა გადაწყვეტილების საფუძველზე დაშლილმა შეზღუდული პასუხისმგებლობის საზოგადოებამ შეიძლება გააგრძელოს არსებობა, თუ ამას გადაწყვეტს საერთო კრება კენჭისყრაში მონაწილეთა ხმების 3/4-ის უმრავლესობით და საზოგადოების ქონების პარტნიორთა შორის განაწილება არ დაწყებულა.
21. დაშლილი საზოგადოების მიერ არსებობის გაგრძელების შესახებ გადაწყვეტილებას მარეგისტრირებელ ორგანოს მეწარმეთა და არასამეწარმეო (არაკომერციული) იურიდიული პირების რეესტრში რეგისტრაციისთვის ლიკვიდატორები წარუდგენენ. მათვე ეკისრებათ იმის დადასტურების ვალდებულება, რომ შეზღუდული პასუხისმგებლობის საზოგადოების ქონების პარტნიორთა შორის განაწილება დაწყებული არ არის.
22. დაშლილი საზოგადოების მიერ არსებობის გაგრძელების შესახებ გადაწყვეტილება ძალაში შედის მხოლოდ მეწარმეთა და არასამეწარმეო (არაკომერციული) იურიდიული პირების რეესტრში მისი რეგისტრაციის შემდეგ.
23. საზოგადოების ქონების სრულად განაწილება იწვევს საწარმოს ლიკვიდაციის დასრულებას. საწარმოს ლიკვიდაციის პროცესი უნდა დასრულდეს საწარმოს ლიკვიდაციის პროცესის დაწყების რეგისტრაციიდან არაუგვიანეს 4 თვისა, ხოლო საგადასახადო შემოწმების ჩატარების ვადის გაგრძელების შემთხვევაში – საგადასახადო შემოწმების დასრულების შესახებ ინფორმაციის მარეგისტრირებელი ორგანოს მიერ მიღებიდან არაუგვიანეს 1 თვისა.
24. ლიკვიდატორებმა მარეგისტრირებელ ორგანოს უნდა მიმართონ ლიკვიდაციის რეგისტრაციის მოთხოვნით, რომლის საფუძველზედაც მარეგისტრირებელი ორგანო გააუქმებს შეზღუდული პასუხისმგებლობის საზოგადოების რეგისტრაციას.

მუხლი 15. ბუღალტრული აღრიცხვა, ანგარიშგება და აუდიტი

1. საზოგადოების ბუღალტრული აღრიცხვა წარმოებს, ანგარიშგების მომზადება და წარდგენა ხდება და აუდიტი ხორციელდება „ბუღალტრული აღრიცხვის, ანგარიშგებისა და აუდიტის შესახებ“ საქართველოს კანონის შესაბამისად.
2. აუდიტის განხორციელებაში შეზღუდული პასუხისმგებლობის საზოგადოების პარტნიორებისა და მმართველობითი ორგანოს წევრების მონაწილეობამ საფრთხე არ უნდა შეუქმნას აუდიტორის დამოუკიდებლობასა და ობიექტურობას.
3. შეზღუდული პასუხისმგებლობის საზოგადოების დირექტორი ერთობლივად არის პასუხისმგებელი „ბუღალტრული აღრიცხვის, ანგარიშგებისა და აუდიტის შესახებ“ საქართველოს კანონის შესაბამისად ანგარიშგების მომზადებისა და წარდგენისთვის.